

8. december 2009

**Inuiaqatigiinni torersuunerup inuillu ataasiakkaat illersorneqarnissaannik inuiaqatigiillu isumannaatsuunissaannik il.il. politiit isumannaarinninnerat, kiisalu politiit pineqaatissiigallarsinnaanerannik Kommuneqarfik Sermersuumut ileqqoreqqusaq**

## **Kapitali 1**

*Politiinut ileqqoreqqusap atuuffissaa il.il.*

**§ 1.** Ileqqoreqqusaq una Kommuneqarfik Sermersuumut atuuppoq.

**§ 2.** Allatut allassimasoqartinnagu, ileqqoreqqusaq una innuttaasut aqqusinerni imaluunniit sumiiffinni allani nalinginnaasumik angallaffigineqarsunnaasunut atuuppoq. Taamaalilluni Allatut allassimasoqartinnagu, ileqqoreqqusaq una innuttaasut aqqusinerni imaluunniit nalunaarut assersuutigalugu innuttaasut sumiiffinni angallaffianni, perusersartarfinni, angallassissutini, tamatumunnga ilanngullugit taxini, nuannaarniartarfinni kiisalu pisiniarfinni, pisiniarfeqarfinni pisortallu allaffeqarfiinni atuuppoq.

*Imm. 2.* Nalunaarummi matumani aqqusineq paasineqassaaq pisortat imaluunniit inuit namminneq pigisaat aqqusernit, cykkilertunut aqqutit, pisuinnarnut aqqusernit, illoqannginnersat, ikaartarfiit, sulluliat, aqqutissiat, aqqusinnguit assigisaalluunniit, angallassissutinit assigiinngitsunit nalinginnaasumik angallavigineqartut.

*Imm. 3.* Ileqqoreqqusami matumani sanaartorfinnik paasineqassaaq sumiiffiit ukua:

- a. Ittoqqortuummiit illoqarfik, Itterajivit aamma Uunarteq,
- b. Tasiilap illoqarfia, Kuummiut, Kulusuk, Sermiligaaq, Tiniteqilaaq, Isortoq aamma Ikkatteq,
- c. Kangilinnguit / Ivittuut,
- d. Paamiut ulloqarfik aamma Arsusuk,
- e. Nuuk illoqarfik, Qeqertarsuatsiaat, Kapisillit, Qoornoq, Itilleq, Narsaq, Kapisillit Kangerluat, Itinnera, Kangeq, Eqaluit Paarliit taamatullu illuaraqarfiit allat, sanaartorneq pillugu inatsiseqarnermi taaneqarsimasut.

*Imm. 4.* Kangilinnguani sumiiffimmi sakkutooqarfiusumi malittarisassat immikkut ittut atuupput Grønlands Kommando-mit aalajangersaneqarsimasut.

## **Kapitali 2**

*Inuiaqatigiinni torersuunerup il.il. isumannaarneqarnera.*

**§ 3.** Parrunnerit, nillianerit, suaartaannerit allatulluunniit nipiliorluni, persuttaalluni ajuallatsitsilluni assigisaanilluunniit iliuseqarnerit, inuiaqatigiinni torersuunermik ajoqusersuinerit, inerteqqutaapput.

*Imm. 2.* Kannunartuliorneq allatulluunniit mamianartuliorneq, allanut ajortuliornerit inuiaqatigiinnulluunniit mamiatsatsitsinerit inerteqqutaapput.

*Imm. 3.* Allanut ajoqutaasinnaasunik aalakoornartutorsimalluni, allatulluunniit aalakoorniutitorsimalluni aangajaarnartutorsimalluniluunniit angallanneq inerteqqutaavoq.

*Imm. 4.* Imm. 1 aamma 2-mi taaneqartut iliuutsit, nalinginnaasumik iserfigeqqusaanngitsuni iliuuserineqarpata, inuiaqatigiillu torersuunerannut akornutaappata, unitsinneqarnissaat politiit naalakkiutigisinnaavaat.

§ 4. Katersuunnerit, inuiaqatigiit torersuunerannut akornusersuutaasinnaasut, inertequtaapput.  
*Imm. 2.* Inuiaqatigiit taamatut akornusersoqarnerat pinaveersaartinniarlugu piumasqaatigineqartunik inertequtunik politiit kinaluunniit nalunaarfigisinnaavaat.

§ 5. Aqqusinerni ingerlaaqatigiinnerit katersuunnerillu nammineerluni politiinut saaffiginnikkut nalunaarutigineqassapput kingusinnerpaamik ingerlanneqannginneranni akunnerit 24-t sioqqullugit. Nalunaarutiginnineq aqqissuisumit taassumunngaluunniit sinniisumit nalunaarutigineqassaaq imarissavaalu katersuunnerup ingerlaaqatigiinnerulluunniit siunertaa, piffissaq, naapiffissaq aamma angallavissaq kiisalu peqataasussat amerlassusissaat.  
*Imm. 2.* Imm. 1-imi aalajangersagaq ilisiartortunut atuutinngilaq.

§ 6. Sumiiffimmi aalajangersimasumi uninngaqqunagu imaluunniit aqutissani naatsuni uteqqattaqqunagu kinaluunniit politiit naalackersinnaavaat, pineqartup uninnganera uteqattaarneralunniit eqqaani najugalinnut eqqaqquttunulluunniit akornutaappat imaluunniit pineqartoq tamaani pillaataasinnaasumik iliuseqartutut peqquteqartumik pasitsaanneqarpat.  
*Imm. 2.* § 3-mi aalajangersakkamik inuk arlaleriarluni unioqqutitsisimappat, kingullermik unioqqutitsiffiusumi piffimmi ungasissutsimi aalajangersimasumi politiit taaneqartumi pineqartoq uteqattaqqunagu uninngaqqunaguluunniit politiit inerteqqummik nalunaarfigisinnaavaat. Inerteqquteqartitsinissamut piumasqaataavoq, peqquteqartumik isumaqartoqarpat, inerteqqummi ilaatinneqartuni sumiiffimmi pineqartoq kukkuluttoqqissasoq.

*Imm. 3.* Imm. 2-mi aalajangersagaq, aqqusinernut tunngatillugu, taamatuttaaq atuutissaaq, imm. 1- imik akulikitsumik arlaleriarluni atuutsitsiffiusumut eqqarsaatigalugu.

*Imm. 4.* Imm. 2 aamma imm. 3 malillugit inerteqquteqarneq allaganngorlugu nalunaarutigineqassaaq tunngavilersugaassallunilu. Inerteqqummut piffissaliussisoqassaaq, ukiunilli marlunnik sivisinerusinnaanngilaq.

§ 7. Susassaqanngitsut tummeqani, isaarissani illunulluunniit majuartarfinni, naqqup ataani qalianiluunniit, illuni inoqanngitsuni inissianiluunniit, quini, sanaartorfinni, angallassitutini assigisaanniluunniit uninngaqqusaanngillat.

*Imm. 2.* Peqquteqavinnani matukkut igalaakkulluunniit kasuttorneq, matup siarnqatigut sianerneq assigisaannilluunniit iliuseqarnerit, najugaqartunik akornusersuutaasinnaasut inertequtaapput.

§ 8. Højtalerinik, nipilersuutinik, nipilersornermi atortunik atuineq politiit inertequtigitisinnaavaat, atuineq eqqaani najugalinnut eqqaqquttunulluunniit annertuumik akornutaasutut isumaqarfiginarpat.

*Imm. 2.* Aqqusinerni tuniniakkat suaartaatigineqarnerat nal. 7 siorna aamma nal. 18 kingorna inertequtaavoq, aamma napparsimmavinnut, atuarfennut assigisaannulluunniit akornutaassanngillat.

§ 9. Allagartarsuarnik saqqummersitanilluunniit nivinngaasuineq agguaassinerluunniit, allagaatinik assinilluunniit tuniniaaneq agguaassinerluunniit inertequtaavoq, tamanna inuiaqatigiit torersuunerannut akornutaappat imaluunniit allagartarsuit, allagaatit, assilluunniit mamiatsannartuuppata.

*Imm. 2.* Erseqqissumik tamakkuninnga inniminniisimasunit najugaqartuniit, allanut allagaatinik assinillu, mamiatsannartunik imaqartunik tunniussineq inertequtaavoq, imarisai allanut akornutaappata imaluunniit inuiaqatigiinnut mamiatsannarpata.

*Imm. 3.* Eqqaqquttunut inuussutissarsiornermi soqutigisanik ussassaarutunik tunniussuineq inertequtaavoq.

**§ 10.** Meeraqqat angajoqqaanit allanilluunniit nakkutigisassaasut, aqqusinerni uninngatillugit pisariaqartumik nakkutigineqassapput.

**§ 11.** Aqqusinerni angalatilluni angallassissutinut sikkilinulluunniit motorilinnut qimmit pitussimaneqassanngillat.

**§ 12.** Aallaasinik, pisissinik, illusaatinik assigisaanilluunniit atuineq, ikumatitamik ikitsineq, ujaqqanik, apummik, imernik allanilluunniit milloorneq inerteqqutaavoq, tamakku eqqaqquttunut naviantorsioortitsippata akornutaappataluunniit.

*Imm. 2.* Sanaartorfiusuni, qoorortuunik, timmiarsiutinik, luftbøssinik aallaasinilluunniit allanik aallaariarneq inerteqqutaavoq.

*Imm. 3.* Sanaartorfiusut avataanni aqqusinerni, sanaartukkani, eqqaavinni il.il. taakkununga imm. 1-imi taaneqartuni aallaasinik aallaariarneq aammattaaq inerteqqutaavoq.

*Imm. 4.* Imm. 2 aamma 3-mi taaneqartuni nunatanut aallaassinik eqqussinnginnermi, aallaasit imaarneqassapput. Nunatat taaneqartut iluanni aallaassinik imalinnik nassataqarluni angalaneq inerteqqutaavoq.

*Imm. 5.* Sanaartorfiusut iluanni, imm. 2-mi aalajangersagaq apeqqutaatinnagu, politiit akuerisaanni immikkut ittuni nunatani unammilluni oqattaasartoqarsinnaavoq.

**§ 13.** Suliaqartoqarpat, eqqaqquttunut navianartorsioortitsisinnaasunik akornutaasunilluunniit, assersuutigalugu illumik iluarsaassinermut aserfallatsaaliuinemulluunniit atatillugu, eqqaqquttunut kalerrisaarutitut illersuutaasinnaasunik ungalulersuisoqassaaq. Ikkat pequtilluunniit qalipaqqammersut panemissaasa tungaanut, eqqaqquttut, ikkat pequtilluunniit qalippammersimaneridik erseqqissumik mianersoqquneqassapput.

*Strk. 2.* Illumi qaliat qalliutaat, aputit, kusukkat assigisaalluunniit nakkakaanissaannut aarleriarqarpat, piginnittup eqqaqquttut illersuutaasinnaasunik ungalulersuinikkut ingerlaannaq mianersoqqussavai piaartumillu isumagissallugu pisariaqartumik iluarsaassisoqarnissaa imaluunniit apummik kusukkanilluunniit il.il. paaasoqarnissaa.

*Imm. 3.* Eqqaqquttunut navianartorsioortitsinermik akornutaanermilluunniit kinguneqartumik illuutini pequtit uppissinnaanngorlugit nakkarsinnaanngorlugilluunniit inissinneqassanngillat atorneqaratilluunniit. Igalaat illersuutaasinnaasumik qajanaarsorneqassapput.

*Imm. 4.* Eqqaqquttunut navianartorsioortitsisinnaasut politiit aammattaaq inerteqqutigitissinnaavaat.

**§ 14.** Kommunalbestyrelsi isumaqatigiinniarfigereerlugu politiit allagartaliinikkut assigisaaniluunniit erseqqissumik tatsini nalunnguarneq, tamatumunnga ilanngullugu, sumiiffinni erseqqinnerusumik taaneqartuni nalunnguarnrupgalanerullu inerteqqutaanerat pillugit aalajangersagaliorsinnaapput.

*Imm. 2.* Imm. 1-imi taaneqartut politiit aammattaaq pujortuleeqqat, vandscooterit assigisaallu atorlugit, erseqqinnerusumik taaneqartumi sinerissamiit ungasissuseqartumi angalaneq pillugu aalajangersaasinnaapput, tamanna angallannernut allanut akornutinik imaluunniit pisariaqanngitsumik nipiliornerit, allanut akornutaasinnaasut pinaveersaartinniarlugit, piunasaqaatigineqartutut isumaqarfiginarpat.

*Imm. 3.* Imm. 1-imi taaneqartut politiit najukkani tatsini aalisarneq angalanerlu pillugit aammattaaq aalajangersagaliorsinnaapput.

§ 15. Politiit oqartussaassorluunniit, tamatumunnga politiit piginnaatitaat, allagarsiinikkut pisortatigoortumilluunniit nalunaarusiornikkut sinerissap avataani sikumi, umiarsualivinni, tatsini, kuunni imeqarfinnilu allani angallanneq pillugu inerteqquteqartitsisinnaapput.

*Imm. 2.* Sinerissap avataani sikumi putusisoqarpat, siku piiarneqartoq putup eqqaanut inissinneqassaq. Politiit piunasaqaatigisinnaavaat putut tamarmik illersuutaasinnaasumik ungalusimaneqassasut nalunaaqutsersorneqarlutilluunniit.

*Imm. 3.* Imm. 1-imi taaneqartuni allani politiit akuersissuteqaqqaartinnagit putuliortoqassanngilaq. Putut illersuutaasinnaasunik ungaluneqassapput nalunaaqutsersorneqarlutillu.

§ 16. Pisortat sanaartugaanni pulaartut torersuunissamik aalajangersakkat, allagarsiinikkut nalunaarutigineqartut, eqqortissavaat torersuunissallu eqqortinneqarnissaanut ilitsersuutit, nakkutilliisunit tunniunneqartut, malissallugit. Taamatuttaaq atuupput torersuunissamik aalajangersakkat, allagarsiinikkut nalunaarutigineqartut, kommunalbestyrelsimit oqaaseqarfigineqareerlutik politimesterimit akuerineqartut, nunaminertat ersarinnerusumik killilersukkat namminermik pisortanilluunniit pigineqartut, aqquseminerni allaniluunniit nalinginnaasumik tikinneqarsinnaasut, tak. § 12.

### **Kapitali 3**

#### *Pineqaatissiigallarnerit*

§ 17. Politiit naalakkiuteqarnikkut inerteqquteqartitsinikkulluunniit pineqaatissiigallarsinnaapput, inuiaqatigiinni torersuunerup inuit ataasiakkaat imaluunniit pisortat isumannaatsuunissaanut navianartorsiomerit pinaveersaatinneqarnissaat pisariaqaraangat.

*Imm. 2.* Imm. 1 malillugu naalakkiuteqarneq inerteqquteqartitsinerluunniit politimesterimit imaluunniit taassumap tamatumunnga piginnaatitaani aalajangerneqassaaq. Aalajangerneq pisortatigoortumik nalunaaruteqarnikkut nalunaarutigineqassaaq tunngavilersugaassallunilu aamma aalajangiussinermi atuuttoq sumiiffik piffissarlu taallugit.

*Imm. 3.* Piffissaq, aalajangiussinermi atuutinneqartoq, sapinngisamik sivikitsuussaaq qaammatillu pingasut sinnissanagit. Piffissaq sivitsorneqarsinnaavoq, taamaattorli sivisunerpaamik qaammatit pingasukkaarlugit. Sivitsuineq nutaamik aalajangiussinikkut ingerlanneqassaaq, tak. imm. 2.

### **Kapitali 4**

#### *Pineqaatissiinerit*

§ 18. §§ 3-13 aamma § 15, imm. 2-mik unioqqutitsineq, § 14 aamma § 15, imm. 1-imik aamma § 16 naapertorlugit malittarisassanik aalajangersakkanillu unioqqutitsineq imaluunniit § 3, imm. 4, § 4, imm. 2, § 6, imm. 1 aamma 2, § 8, imm. 1, § 13, imm. 4 aamma § 17 naapertorlugit naalakkiutinik inerteqqutinilluunniit unioqqutitsineq eqqortitsinngitsoornerlu pinerluttulerinermik inatsimmi aalajangersakkat naapertorlugit akiliisitsinermik arsaarinnissuteqarnermillu pineqaatissiissoqassaaq.

*Imm. 2.* Aktieselskabinit, andelselskabinit assigisaannilluunniit unioqqutitsineq, ingerlatseqatigiiffiit akiliisussanngortinneqarsinnaapput arsaarinnittoqarsinnaallunilu.

### **Kapitali 5**

#### *Atuutilerfissaa*

§ 19. Politiinut maleruagassaq atuutilissaaq aalajangersarneqarneranit sapaatip akunnera ataaseq qaangiuppat.

*Imm. 2.* Tamatuma peqatigisaanik Paamiuni politiinut maleruagassaq 6. oktober 1993-imeersoq, Ittoqqortoormiit politiinut maleruagassaq 11. maj 1994-imeersoq, Nuuk politiinut maleruagassaq 13. september 1994-imeersoq, Ammassalik politiinut maleruagassaq 28. november 1994-isimeersoq aamma Ivittuut politiinut maleruagassaaq 16. oktober 1996-imeersoq atorunnaarsinneqarput.

Kommuneqarfik Sermersooq, ulloq 29. december 2008

**Asii Chemnitz Narup**

**Ikaarsaariarnermi Ataatsimittitaliap Siulittaasua / Borgmesteri**

Qulaani pineqartoq ileqqoreqqusaaq, inuiaqatigiinni torersuunerup inuillu ataasiakkaat illersorneqarnissaannik inuiaqatigiillu isumannaatsuunissaannik il.il. politiit isumannaarinninnerat kiisalu politiit pineqaatissiigallarsinnaanerannik Kommuneqarfik Sermersuumut ileqqoreqqusaaq matumuuna aalajangersarneqarpoq.

Nuuk, ulloq 8. december 2009

**Søren Hald Møller**

**Rigsombudsmandi**

